

## Vorrede.

wachs/ Gehülz/ Zeiche/ vnd dergleichen begriffen/  
gar gröblichen geirret vnd gefehlet wird/ Also/ das  
offtermals dem keuffer vnd verkeuffer / wol vmb die  
helfft/ oder mehr/ vnrecht vnd zu kurtz geschicht/ vnd  
solchs iho so bald/ durch die / so sich geschworne vnd  
vereidete Feldmesser schelten vnd halten lassen/ Als  
durch einfeltige vnerfarne Bawrsleute / so sich des  
Feldmessen auch bisweilen vnterfahen / vnd dann  
solchs in verkeuffung oder auslassung der Gehölze/  
vnd anderer Feldgüter/ Fürsten vnd Herrn so wol  
als derselben vnterthanen mehrmals betrifft/ Wie  
denn glaubwürdige Exempel / mit gutem grunde  
von mir köndten angezogen werdē/ Das noch new  
licher zeit ein Gehülz drey mal gemessen worden /  
Vnd einmals 26. Tausent Acker/ Das andermal  
36. Tausent Acker/ Vnd das letzte mal/ 27. Tau  
sent Acker hat haltē sollen/ welches doch alles dreyes  
nimmermehr zugleich kan war sein/ sondern ihr zwe  
ne / wo nicht alle drey / redlich der scheiben gefehlet/  
vñ vmb ein 10. oder 12. Tausent gülden dem Herrn  
aus dem Beutel gemessen haben.

Als habe ich es dafür geachtet / das sich einer  
mercklichen wol vmb gantz Deudtschland verdie  
nen/ vnd dem Vaterlandt danckbar hiemit erzeigen

A iij

köndte/